

Kerweredd 2010



verfasst von Nino Piazza



vorgetragen von Tobias Wohlfahrt

Ich grieß eich all, ehr liewe Leit,
dass ehr zur Kerb heit kumme seid,
noch em longe Winter macht es Spass,
dass jetzt die Leit wärrer gäin uff die Gass!
Fussball-WM iss des Johr unser Thema,
ich hoff, e Sommermärche, des wärd wahr,
dezu kimmt noch noch dem vorsjohr Jubiläum mit värzisch Johr Kerwe,
sou iss meer heit noch eine Ehre,
for dreisich Johr Kerwezeitung mich zu bedanke,
an all die Schreiwere, ob fremme orrer bekamte,
30 Johr Kerwezeitung unn immer woss drin,
drinn stäit zwar veel Unsinn, doch monches macht Sinn!

Sou bring ich aach dess Johr, eich e paar Sache,
monsche sinn, ernschd, äwwer veel iss zum lache.
Bevors jetzt lous gäit, isch will misch jo beim babble net qäle,
muss isch erscht mol moi Gurgel eehle!
Prost!

MUSIK

Doch bevors lousgäit, stell ich eich hier om Oufong fum Oufang glei,
moi Leit vor unn wer iss debei:

Endlich wurd es desjohr wahr,
Kerwekönischin iss die Staffas Anna!
Die Tochter vum Wolfgang, gonz lieb unn zart,
hott lange Johrn dodruff gewaad!
Sie wärd begleitet, des gibt scheene Bilder
fun Sina Flath und Theresia Tilger!
Moi zwaa onnern Kerweborsch,
des iss wohr,
die kennt ehr jo noch vun vorsches Johr,
aus Hoabecher Holz gewitzt geschnitzt, druff bin ich stolz,
sinn Kevin Schuster unn Timo Wolff!
Des dollschde iss, ehr liewe Leit,
die Kerwekönischin hot Gebotsdoag heit.
Ich gratulier unn meer all minonner,
wünsche des beschde all zusomme,
veel Glickwensch unn aach alles gute,
ferner aach fum Karl, de Hedi unn de Ute!

Königin:

Donke - sou trink ich uff eich, ehr liewe Leit,
die Könischin, die braucht des heit!

MUSIK:

Happy Birthday to you!

Sou,
do fonge meer mol mim Oufong ou!

Mehr sinn all frou, des gonz bestimmt,
wenn veel Besuch vun auswärts kimmt,
sei es aach gonz unverhole,
unsern Mitsche-Bäcker, der aus Pole,
letschd Johr, do wor er uff Zack,
en Flug noch Hoambach on Kerb gebucht,
do wor ich platt, katt hat!
On Kerwemondoag wollt er wärrer hoam,
un wurd mojends frieh on de Flughafe gefahn.
Doch soi Rick-Ticket konnt er nett oilöse,
do gab er sich die Blöse,
denn des Fludatum uff em Flugschoi,
des konnt säije ein jeder,
uff de Doag on Monat später!
Also nix mit Rickflug, wos machte meer jetz,
nix wie wärrer ins Auto gesetzt,
zurück fun Fronkfort ins Hoambecher Daal,
gefeiert wurd weirer, er hott katt koa Wahl.
Doch negschd mol gug, des wär doch foi,
vorher besser in doin Flugschoi noi,
donn siehschd donn, des is donn doi Glick,
wonn doin Flug donn gäit zurick!

Sou, isch glaab isch häbb schun werrer Dorschd,

meer leit nix drou, heit iss meers worschd! Prost!

Jetzt muss isch ewwer aach mol kritisch wärn,
denn fun Owwerhoamboch hott meer jo 20 Jahr nix gehäiert,
orrer ärr isch misch do!

Uff jeden Falls wor unbestritte,
letschd Jahr Owwerhoamboach fun de Außewelt obgeschnitte,
denn irgendsouen Baggerführer hotts geschafft katt hat,
dass der die Telefonleitung gekappt hot hat.
unn zwar wor des geschehe,
om Wendeplatz, wu die Bus als drehe!

Wor des schun mol e schlechtes Zeiche,
bewusst gemocht, dass koa Informatione aus de OSO entweiche?
Ich waas es nett uff jeden Fall, do brauch isch mit koam dischbediern,
fun Owweerhoamboach konnt koaner,
weder naus noch rou telefoniern!

Die OSO hot eischendlich, ja des iss wohr,
desjohr Jubiläum, nämlich 100 Jahr.
Isch musst, des kann jeder wisse beileibe,
jetzt moin gonze Text umschreibe!
Statt Lobeshyme, so kann meers sehe,
duns sich die Gründer im Groab rumdrehe,
Wos wor do lous, frog isch unscheneriert,
woss is do owwe all bassiert.
Die Zeitung dutts faschd täglich berichte,
aach des Fernseh konnt nett druff verzichte.
Ich hoff unn wünsch, die wärn do owwe geweckt,
unn jeder Fall aach uffgedeckt.
Demit die Fraa Kaufmann, die Schulleitung,
zukunftdisch besser schlofe kann.
Des wärd zwar schwierig, isch sogs eich ehr Leit,

Vertraue zurickzugewinne, des braucht veel Zeit.

Zum Wohl!

MUSIK

In de Wärschinggass herrscht Schrittgeschwindigkeit,
dess wisse aach die meischde Leit,
longsom fahn iss Oberschdes Gebot,
weils dort schon Ufäll gäwwe katte hot!
Doch de Martina Meon war letschd Johr nett gonz klar,
dass die Polizei monchmol uffstellt, sou e Ding Radar.
Sou fuhr die Martina, wie jedi Woch,
dorsch die Stroß, dem enge Loch,
hott e schee Gesicht gemocht, die hott parriert,
im negschde Moment wurd fotografiert,
jetzt iss se bei de Polizei in de Anale,
als Raserin, isch will nett praale,
doch nett mim Auto, wie jeder schon denkt,
noa, eh Fahrrad hott se gelenkt,
hott schoinbar getromt, sie hed e Chacs,
zu tränieren fär Tour de France!
Es gab koan Strofzettel, des wor nett sou wild,
eh Fahrrad hott jo koa Nummernschild!

Apropo Geschwindigkeit, es gibt tolle Renne,
fun Formel 1 bis Sheeserenne.
Sou wurd die Stroß im Owwerdorf, des iss koan Wohn,
letschd kurzfristig zur Galobbrennbahn,
Zum Glick wors owends un nett veel lous,
sunschd wär der Schade riesegrouß!
Ich häbs gesäije, do muss meer sich setzete,

wie e paar Geil die Gass runnerwetze.
Ich häb gedenkt, ich old Allmoi,
dass kennt doch nur Viezeig fum Mitsche Bernd soi,
weil meer jo schun immer wisse,
dass dem soi Gaase ausbixe un fresse uff fremme Wisse!

Doch deesmol häb ich mich verrennt,
ich hätts jo nie im Lewe gedenkt,
dass des wos bassiert iss, ich Almoi,
kennt aach vun onnern Leit Veezeig soi!
es worn nett dem Bernd soi Exemplare,
sonnernd dem Holze-Jürgen soi wunderbare,
Geil, die owwe sunscht alls uff de Waad,
fresse Groass gonz butterart!.....
Sou konns doch jedem passiern gonz gewitzt,
dass alls emol des Veeh ausbixt.
Un ich sogas gonz frisch unn frei,
es misse nett immer dem Russe-Mitsch soi Gaase soi!

Es wor nix bassiert, drum uff eier Wohl,
ich trink jetz en Schluck Alkohol!

MUSIK

Doch wonn meer schun beim Veehzeig sinn,
bei uns im Wold läbt arg veel drin.
Vor allem die Willsai, sinn rischische Reiser,
die kumme sogar bis on die Haiser!
So iss letschdens, ich konns berichte,
dodruff kann meer nett verzischde,
e Willsau beim Ungers-Rudi in die Werksatt gerennt,
de Rudi uff Zack, er hott nett gepennt,
hott glei die Deer hinner sich zugemoacht gonz fix,
unn hott gedenkt, liewi Sau, mit obhaue, des wärd nix.
Er wollt se jo donn in de Saistall noisperrn bei sich,
for Sunndogs uff em Middogsdisch.
Doch die Wildsau, die hott des nett gejuggt,
die hot drei vier mol gonz dumm geguckt,
die hott sich gar nett long besunne,
unn iss dorschs geschlossene Fenschder in die Freiheit gesprunge!
Denn Schoade, ja, jetzt guggt ruhisch hie,
denn hott jetzt unser Ungers-Rudi!
Die Moral vun dere Sach,
eh Willsau macht schun gonz veel Krach!
Du e Willsau lieber schieße,
denn konnschd du doin Sunndoagsbrode aach genieße!

Musik

Wos macht denn der Sportplatz, des frog ich mich,
des kimmt seit drei Johr schun uff de Disch,
isch wollt jo schun zwootausendneun,
uff dem Groas leie uff Arena uff Schalbert im Sunneschoin,
doch des waade hot hoffentlich bald e End, isch du schunn beede,
dass ichs in moim Leäwe wärd des noch erlewe!
Das der Platz endlich verdisch wärd unn gonz frisch,
gekickt wärn kann, sou hoffe ich!
Meer brauche denn Platz, der iss for uns wischdisch,
sunnschd kimmt der Doag, do wunnerschde dich,
wonns haaast, in Hoamboach gibt's koan Sport,
die junge Leit, die sinn all fort!
Doch sou weit wärn meers nett kumme losse,
ball gäits hoffentlich wärrer lous, des sin koa Bosse!

MUSIK

Unsern Bojemoschder, der Gerhard Herbert,
ehr häbbts in de Zeitung vernumme,
iss vor zähe Johr noch Hoamboach kumme.
Er kam jo wie aus de Litarnai,
aus Mittelhesse, also der Wallachei!
Als Stadtrat fun Hepprum, wollt er wohne unbedingt,
in die Wasserschepp, sou wies holt kimmt.
Denn er waas un hotts aach sou erlebt,
Hoamboach hott die beschd Lebensqualität!
In die Kreisstadt direkt wollt er nett,
unn Erbach wor ihm nett adrett.
Ferner lies er aach noch sause,
e Wohnung driwwe in Kerschhause,
Wald-Erleboch unn Scheierberg,
worn ihm schun domols nett veel wert,
Sou hott er gesoat, ich soags zart un nett,
moi Bett geheert in die Wasserschepp.
Des Flecksche Erd iss zwart unn sieß,
in moim Garde wochse Erdbeern unn Gemies!
Meer sinn stolz, ich wärr nett mied,
die onnern häwwen gewollt, äwwer meer häwwen Gott sei Donk griecht!

MUSIK

Ende gut alles gut, ehr lieve Leit,
feiert noch schee on Kerwe heit,
unn macht fun meer aus munter, heiter,
ach moje noch mim feiern weiter!
Ich donk eich unn holt jetzt moi Schnutt,
unn hoff, dass er meer nix krumm nemme dut!
Den Hoangobrutsch unn onnern Bosse,
aach die Sanierung der Schloßberghall,
háb isch raus gelosse,

**Ewesou, gonz korz unn knapp,
wenn um 8 Uhr mojends onner for de weiese Sunndog,
gebunne will hou fun de Nochbarschaft soi Krawatt!**

Denn sunscht wär, do wär meer gonz bong,
die Kerwered doch veel zu long.
Häbb ich aach heit monches kritsch betracht,
verzeihts meer, Humor iss, wenn meer trotzdem lacht!
Uff unser Hoamboach trink ich jetzt moin Woi,
schenkt eich all minonner oi,
ich stouß ou mit voller Kraft
uff e schee Kerwe un Weltmeisterschaft.
Vielleicht, - meer iss es äwwer noch nett klar,
wärd wieder ein Sommermärche wahr.

Prost

Wem iss die Kerwe.....

MUSIK: IM TALE DER ROSEN